

## МАЯ В 25-Й ДЕНЬ

ТРЕТИЕ ОБРЕТЕНИЕ ЧЕСТНЫЯ ГЛАВЫ СВЯТАГО СЛАВНАГО ПРОРОКА, ПРЕДТЕЧИ И  
КРЕСТИТЕЛЯ ИОАННА

### ВЕЧЕР

Поем Блажен муж: На Господи, возвах: стихиры праздника 3  
И Предтечи 5. Аще же пост, стихиры на 6, глас 8.

Подобен: О, преславного чудесе:

Блаженне Иоанне Предтече, \* паче солнечных луч возсиявши, \* облиста от земли глава твоя \* и верныя просвети, \* юже яко Божественное сокровище, имуще, \* богатную благодать почерпаем, \* освящающе души, \* и телеса, и помышления, \* и, торжествующе, тя ублажаем.

Благодать неоскудну источающи, \* священная глава твоя, блаженне Предтече, \* священнику Богомудру, \* не ведящу показуется, \* иже потщася верою и благодатию, \* явленно творит сея пришествие, \* освящаяся с людьми Богомудрыми \* веру православну \* тепле утверждающе.

Третье празднуем явление \* твоя честныя главы, \* юже Троица венчала есть, \* усечена бывши, славне, ревности ради Божественныя; \* и обретением сея радуются \* ангельстии чини, \* мученик сословие, Божественнии апостоли и пророцы вси. \* С нимиже нас всегда поминай, \* Господень Предтече.

Слава, глас 6:

Сокровище Божественных даров, \* Богохранимая глава твоя, Предтече, \* от земных недр возсия, \* юже мы верно приемлюще и покланяющеся, славне, \* обогащаемся от Тебе, Христов Крестителю, \* чудесы преславными \* и согрешений прощением.

И ныне, праздника. Аще ли пост: И ныне, Богородичен 1-й. Вход. Прокимен дне.

Пророчества Исаина чтение (главы 40, 41, 45 и 48):

Такое глаголет Господь: утешайте, утешайте люди Моя, глаголет Бог: священницы, глаголите в сердца Иерусалиму, умолите его, яко умножися смирение его. Разрешися бо грех его, яко прият из руки Господни сугуба согрешения своя. Глас вопиющего в пустыни: уготовайте путь Господень, правы творите стези Богу нашему. На гору высоко възиди, благовестуй Сиону, възвышай крепостию глас свой, благовествуяй Иерусалиму: вознесите, не бойтесь, Аз Господь Бог, Аз услышу убогих, Израилев, и не оставлю тех. Но отверзу от гор реки и посреде поля источники сотворю, пустыни в луг и жаждущую землю во источники водныя. Да возвеселится небо свыше, и облацы да кропят правду, да возсияет земля, и да прозябнет милость, и правда да возсияет вкупе. Глас веселия возвестите, и услышано да будет, возвестите даже до конец земли, глаголите, яко избави Господь раба Своего Иакова и, аще вжаждут в пустыни, источит им воду из камене. Возвеселися, неплоды нераждающая, расторгни и возопий, неболевшая, яко многа чада пустыя паче, нежели имущия мужа.

Пророчества Малахиина чтение (глава 3):

**Т**ако глаголет Господь Вседержитель: се Аз посылаю Ангела Моего пред лицом Твоим, иже уготовит путь Твой пред Тобою. И придет во храм Свой Господь, Егоже вы ищите, и кто стерпит день входа Его? Занеже тому приити, яко огонь в горниле и якоже былие перущих, и очистит, поядая и очищая яко сребро и золото. И придет к вам судом, и будет свидетель скор на лукавья, и на прелюбодейцы, и на кленущияся именем Моим во лжу, и на лишающия мзды наемника, и на насильствующия вдовицы и пхающия сирья, и на уклоняющия суд припельца, и на небоящияся Его, глаголет Господь Вседержитель. Зане Аз Господь Бог ваш, и не изменю Себе; и вы, сынове Иаковли, уклонистесь от закона и не сохраните. Сего ради обратитесь ко Мне, и обращуся к вам, глаголет Господь Вседержитель, и ублажат вас вси языцы, и разумеите, яко Аз Господь, смотряий посреди праведнаго и посреди беззаконника в день он, вонже сотворю снабдение любящим Мя. Познайте убо и помяните закон Моисеов, раба Моего, якоже заповеда вам в Хориве, ко всему Израилю повеление и оправдание. И се Аз пошлю вам Илию Фесвитянина, прежде даже не приити дню Господню великому, просвещенному, иже направит сердце отца к сыну и сердце человека ко искреннему своему, да не, пришед, поражу землю вскоре, глаголет Господь Вседержитель, Бог Святыи Израилев.

#### Премудрости Соломони чтение (главы 4 и 5):

**П**раведник, аще постигнет скончатися, в покои будет. Осудит же праведник умираий живуция нечестивья, узрят бо кончину праведнаго и не разумеют, что совещаща о нем, яко повержет Господь нечестивья безгласны ниц и поколеблет их от оснований, и до последняго исчезнут в болезни, и память их погибнет. Приидут бо в помышлении согрешений своих ужасни, и обличит их сопровит беззакония их. Тогда станет в дерзновении мнозе праведник пред лицом оскорбивших его и отметающих труды его. Видевше же его, смятутся страхом многим и ужаснутся о преславном спасении его. Рекут бо в себе, кающесе, и в тесноте духа воздохнут, и рекут: сей бе, егоже имехом некогда в посмех и в притчу поношения, безумнии, житие его вменихом неистово и кончину его безчестну. Како вменися в сынех Божиих и во святых жребий его есть? Убо заблудихом от пути истиннаго, и правды свет не облиста нам, и солнце не возсия нам. Беззаконных исполнихомся стезь и погибли и ходихом стези непроходны, пути же Господня не разумехом.

#### На стиховне стихиры, глас 1.

##### Подобен: Небесных чинов:

**П**риидите, торжество Божественное светло совершим: \* Света бо светильник, \* глас же Слова, друг Женихов, \* великий светильник истины \* явися Креститель Господень, \* показав нам святую главу свою.

**Стих:** Тамо возвращу рог Давидови, \* уготовах светильник помазанному Моему.

**О** блуднем беззаконии Иродова деяния \* и прелюбодейственныя скверны \* беззаконнующа обличил еси, яко проповедник чистоты, \* во главу усечен был еси, Предтече, \* юже благодатию Божественных чудодеяний \* верным ныне открыл еси.

**Стих:** Помяни, Господи, Давида \* и всю кротость его.

**Я**коже Боготочный благодатей источник, \* от земных недр источающ чудеса, \* главу Предтечеву, \* яко сокровище дарований \* приемше, от Бога явленну, \* радостно восхвалим, празднолюбцы.

Слава, глас 2:

**Я**коже Божественных умышлений, \* всечестная рака неизреченного существа, \* ясно провидевшая таинство, глава твоя, \* яко от ложесн матерних, от сокровищ земных днесь возсия, \* Иоанне всехвальне, \* и облаговони всю подсолнечную, освящения проливающая миро, \* и мысленно проповедающая путь покаяния, \* и Спасу всех молящаяся о душах наших.

И ныне, дне или Богородичен.

Тропарь, глас 4:

**Я**ко Божественное сокровище, сокровенное в земли, \* Христос откры главу твою нам, пророче и Предтече. \* Все убо, сошедшее в сея обретение, \* песньми богоглаголивыми Спаса воспоем, \* спасающа нас от тления молитвами твоими.

Слава, и ныне: **Е**же от века угаемое: Или праздника.

## НА УТРЕНИ

На Бог Господь: аще есть Пятдесятница, тропарь праздника, дважды.

Слава, Предтечи. Глас 4:

**Я**ко Божественное сокровище, сокровенное в земли, \* Христос откры главу твою нам, пророче и Предтече. \* Все убо, сошедшея в сея обретение, \* песньми богоглаголивыми Спаса воспойм, \* спасающа нас от тления молитвами твоими.

И ныне, праздника.

Аще же ни, тропарь: Предтечи, дважды. Слава, и ныне, Богородичен.

По 1-й стихологии седален, глас 4.

Подобен: Скоро предвари:

**О**т земли возсиявши, нетленная Предтечева глава лучи испущает исцелений верным, \* свыше собирает множество Ангел, \* доле созывает человеческий род, \* единоголасную возсылати славу Христу Богу.

Слава, и ныне, праздника. Аще ли пост, Слава, и ныне, Богородичен. Подобен:

**Д**ево Всенепорочная, Яже Пресущественнаго Бога рождающая, \* со Предтечею Того непрестанно моли \* оставление прегрешений, и исправление жития дати нам прежде конца, \* верою и любовию поющим Тя по долгу, едина Всепетая.

По 2-й стихологии седален, глас 4.

Подобен: Вознесыйся:

**И**здавшияся, яко золото от руды, \* священная твоя глава преславно от незаходимых недр земных, \* обогати верных вся мысли разумением Божественным ныне, \* покайтесь, вопиюще обычно, \* ейже покланяющесе, Предтече, Христа велегласно верою славим.

Слава, и ныне, праздника или Богородичен:

**И**же на престоле Херувимстем седяи и в недрах Отчих водворяяся, \* яко на престоле святем седит Своем, Владычице, в недрах Твоих. \* Воплощся бо Бог воистинну, воцарися над всеми языки, \* и разумно ныне поим Ему, \* Егоже умоли спастися рабом Твоим.

По полиелеи седален, глас 4.

Подобен: Явился еси:

**И**род, Предтече, беззаконновав, \* честную главу твою мечем отсече бедне, окаянный, \* юже от любве, вернии, целуем.

Слава, глас 8.

Подобен: Повеленное:

**К**рестителева глава крыяшесе, яко бисер, в земли влажней, \* и, яко свещник богосветел, украшена, озаряет, чудотворящи миру всему: \* яко утро, возсия всеблаголепно солнцу Предтеча, \* и невечерним светом возвещая паки нам, \* се, – зывая, – Агнец Божий.

И ныне, Богородичен:

**Я**же непременного Бога порождающая, \* прменяемое присно сердце мое грехом и леностию, прилогми льстиваго \* утверди, Благая, молитвами Матерними Твоими, \*

яко да и аз благодарно славлю Тя, Богородительнице Марие, \* помилуй стадо Твое, еже стяжала еси, Всенепорочная.

Степенна, первый антифон 4-го гласа.

Прокимен, глас 4: Тамо возвращу рог Давидови, \* уготовах светильник помазанному Моему.

Стих: Помяни, Господи, Давида и всю кротость его.

Всякое дыхание:

Евангелие от Луки, зачало 31.

**В**о время оно, изыде слово о Иисусе по всей Иудее, и по всей стране. И возвестиша Иоанну ученицы его о всех сих. И призвав два некая от ученик своих Иоанн, посла ко Иисусу, глаголя: Ты ли еси Грядый, или иного чаем? Пришедша же к Нему мужа, реста: Иоанн Креститель посла нас к Тебе, глаголя: Ты ли еси Грядый, или иного чаем, в Той же час изцели мнози от недуг и ран и дух злых и многим слепым дарова прозрение. И отвещав Иисус рече има: шедша возвестита Иоанну, яже видеста и слышаста, яко слепии прозирают, хромии ходят, прокаженнии очищаются, глушии слышат, мертвии встают, нищии благовествуют. И блажен есть, иже аще не соблазнится о Мне. Отшедша же ученикома Иоанновома, начат глаголати к народом о Иоанне: чесо изыдосте в пустыню видети, трость ли ветром колеблему? Но чесо изыдосте видети? Человека ли в мягки ризы одеяна? Се, иже во одежди славней и пищи сущии, во царствии суть. Но чесо изыдосте видети? Пророка ли? Ей, глаголю вам, и лишше пророка. Сей бо есть, о немже писано есть: се, аз пошлю Ангела Моего пред лицом Твоим, иже устроит путь Твой пред Тобою. Глаголю бо вам: болий в рожденных женами пророка Иоанна Крестителя никтоже есть, мний же во Царствии Божии болий его есть. И вси людие слышавше и мытарие оправдиша Бога, крещшеся крещением Иоанновым. Фарисее же и законницы совет Божий отвергоша о себе, не крещшеся от него.

По 50-м псалме стихира, глас 6:

**Я**же первее на блюде, \* Иродову беззаконную нечистоту обличившая, \* покаяние же всем проповедавшая верным, \* честная глава Крестителя Христова, \* от сокровищ земных явльшаяся, \* предлежит верно притекающим к ней, \* и прикасающимся со страхом, \* и поклоняющимся любовию душевною, \* дарующая разрешение прегрешений, \* прощением подает потребная и велию милость.

Аще есть 50-ца, канон праздника со ирмосом на 6. Аще ли пост, канон Богородицы со ирмосом на 6 и Предтечи на 8, глас 8.

Песнь 1

**Ирмос:** Колесницегонителя фараоня погрузи \* чудотворяй иногда \* Моисейский жезл, крестообразно поразив \* и разделив море, \* Израиля же беглеца, пешеходца спасе, \* песнь Богови воспевающая.

Глас Слова быв, разреши безгласие мое, яко отцу древле, радостным гласом восхвалити тя в настоящее обретение главы твоея, блаженне Предтече, Небесный человеце.

**Н**а главу руку положивый, Предтече, Церкви Божии, твою честную главу, познавшую Троицы явление, проявляеши се третье, преевственню освящающую православных собрания.

**Не** терпя на мнозе сокрыватися, Господень Предтече, устрояеши паки явитися днесь, не в стамне затворен, сребрене же сосуде в священном месте положен, священнодействию извещен.

**Царствующий** яве град ныне приемлет священный дар, иже прежде лишен быв главы твоя, Предтече, тоя входом красяся, ныне радуется и достождно ублажает тя.

**Богородичен:** От чрева неплодныя прозябл еси, готова Творцу словом пути, всехвальне от Девы возсиявшему Пресвятыя несказанно, Юже Богородицу ведуще, вси роди, ублажаем.

**Катавасия праздника, аще ли пост: Отверзу уста моя:**

### Песнь 3

**Ирмос:** Небеснаго круга Верхотворче, Господи, \* и Церкви Зиждителю, \* Ты мене утверди в любви Твоей, \* желаний краю, верных утверждение, \* Едине Человеколюбче.

**Б**лудным плясанием, священная глава твоя, скверней жене вдана бывши, рукама ношашеся, ныне же целомудренно священнодействия дланьми священно во святую церковь вносится.

**Б**лагочестно сретает тя верных совокупление, с священнодействием же царь, славне Предтече, поюще радостию, и предваряет тя любовию, освящаемъ пришествием твоим.

**О**т незаходимых священных, яко светозарное солнце, священнейшая глава твоя возсиявши, всю просвети вселенную, пророче Христов и Предтече, Божественными светлостми.

**Богородичен:** От неплодных чресл светоявленна возсиял еси звезда Солнца славы, предходяй Возсиявшаго от Девическа облака, Крестителю, и разрешшаго ночь многобожную.

**Кондак и икос праздника.**

**Таже седален, глас 4.**

**Подобен: Вознесыйся:**

**И**здавшись, яко злато от руды, \* священная твоя глава преславно от незаходимых недр земных, \* обогати, Христов Крестителю, всех притекающих в тоя обречение, \* песньми величающих Спаса и Зиждителя, \* подающего нам тебе ради велию милость.

**Слава:**

**П**ророче Божий и Предтече благодати, \* главу твою, яко шипок священнейший, от земли обретше, \* исцеления всегда приемлем, \* ибо паки, якоже прежде, \* в мире проповедуеши покаяние.

**И ныне, праздника или Богородичен:**

**Г**рехолюбив сый, молю Тя, \* безгрешнаго Бога рождшую, вземлющаго грехи мира, Пречистая, \* многогрешную душу мою ущедрити и грехи моя многия очистити: \* грешных бо Ты еси очищение, и спасение верных, и заступление.

**Аще ли пост, седалны точию святого Иоанна. И ныне, Богородичен.**

**Песнь 4**

**Ирмос:** Услышах, Господи, \* смотрения Твоего таинство, \* разумех дела Твоя \* и прославих Твое Божество.

**Пророков** яко превышший, Прореченнаго видети сподобился еси, Илииною предыдый силою пред Ним, блаженне Предтече.

**Преславную** главу твою, миры исцелений источающую, третье уже явил еси, смрадныя страсти отгоняющую.

**Не** в стамне, якоже первее, в сосуде же сребрене погребена является глава твоя в священнем месте, досточудне.

**Сопедшеса,** почерпите вси исцеления неистоцимая от источника издаваема, честныя главы Предтечи Христова.

**Богородичен:** Смирившагося спаси мя, высокоумудренно пожившаго, рождающая Вознесшаго смирившееся естество, Пречистая.

### Песнь 5

**Ирмос:** Вскую мя отринул еси \* от лица Твоего, Свете незаходимый, \* и покрыла мя есть чуждая тьма, окаяннаго? \* Но обрати мя и к свету заповедей Твоих \* пути моя направи, молюся.

**Яко** ходатай ветхаго и новаго быв священнейший, ходатайствы Божественными наше обветшание обнови, обновление совершающих новым явлением главы твоя, блаженне Предтече.

**От** Коман принесшую благодать исцелений главу твою к Царскому граду, Предтече, созываеши грады днесь к тоя пришествию: собираются верных множества, просвещения нетленного исполняеми.

**Царь** входу главы твоя множае, неже багрянице, радуется, священник же, Божественный Богоносца тезоименитый, Предтече, дланьми сию обдержая, соблагословляет, благословя верных совершенства.

**Богородичен:** Владыку рождаши, явилася еси превышшая Горних сил и земных естество богосоделала еси, Отроковице Всенепорочная. Темже Богородицу всеистинную душею и языком, вернии, Тя, Дево, славим.

### Песнь 6

**Ирмос:** Очисти мя, Спасе, \* многа бо беззакония моя, \* и из глубины зол возведи, молюся, \* к Тебе бо возопих, и услыши мя, \* Боже спасения моего.

**Истина** от земли, глава возсиявшая Крестителя Твоего, Христе, лжу отгна, ересей разори горькую зиму и мир просветила есть.

**Почерпите** просвещение, и благодать Божию, и милость и главы, и души осятите, главе прикоснувшись Предтечи благодати, Божественному верху прикоснувшись в водах.

**Главы** врагов под нозе сокрушити воинству нашему, молися, Предтече, любовию честную твою главу чтущему, Ирода обличившую.

**Богородичен:** Сущим во аде Свет проповедал еси, приходящаго от кровей Девических, плотию обложена бывша Человека, на благодаяние человек, блаженне Предтече.

### Кондак, глас 6.

**Подобен:** Еже о нас:

**С**ветоявленный и Божественный в мире столп, \* солнца светильник, \* Предтеча, главу светоносную и Божественную свою показавый в концех, \* освящает той верно покланяющихся и зывающих: \* Христов премудрый Крестителю, спаси всех нас.

**Икос:** **О**т земли, якоже источник райский, глава боголюбивая Предтечева струи испуцает благодати и чудес токи поаваает всем требующим. Приступим убо вси, почерпем усердно исцелений Божественныя сея потоки: напояет бо души даровании непрестанными, и потопляет телесныя болезни, и всяк недуг благовременне отъемлет. Сию убо воспоем любовию, и целуем верою, честно обლობызающе, и песньми, яко венцы, сию, вернии, венчаем. Предочистим наша скверны мысленныя, и Божественными добродетельми украсим души и вопием твердо: Христов премудрый Крестителю, спаси всех нас.

### Песнь 7

**Ирмос:** **О**т Иудеи дошедше, отроцы \* в Вавилоне иногда \* верою Троицескою пламень пещный попраша, поюще: \* отцев Боже, благословен еси.

**С**олнца славы пресветлый свещник был еси, Предтече, тьму отгоняя лести и просвещая верою зовущих: отец наших Боже, благословен еси.

**П**раздник молебен Честная Церковь сей, Предтече, светло совершает, главу твою чтуци и обычно зовуци: отец наших Боже, благословен еси.

**П**ровозвестил еси Слова страшное пришествие Божественными игрании, возвещаещи твоя главы обречение, пророче, неложными усты ты желающему тепле священнодействию пастырю.

**Богородичен:** **Д**евство и рождество паче естества и слова в Тебе стечеса, Бога бо воплощенна родила еси несказанно, Богородице, Емуже поем: отец наших Боже, благословен еси.

### Песнь 8

**Ирмос:** **С**едмерицею пещь \* халдейский мучитель \* Богочестивым неистовно разжже \* силою же лучшею спасены, сия видево, \* Творцу и Избавителю вопияше: \* отроцы, благословите, \* священницы, воспойте, \* людие, превозносите во вся веки.

**К**реститель и Предтеча, земный Ангел, беззакония известный укоризник, Троицы явление прежде видяй, третие являет главу свою всем, любовию поющим: священницы, благословите, людие, превозносите Христа во веки.

**С**ретаает усердно тебе царь кротчайший вкупе со христоролюбивыми людьми, прехвальне, пастырей же первейший простирает руке к тебе, и, свои прилагая перси, играет с веселием, и вопиет благодарно: людие, превозносите Христа во веки.

**П**аче злата глава твоя просиявши, Предтече, сокровиществованна в серебряных сосудах, яко богатство многоценно, Царскому граду дадеса. Тоя даровании богатея Божественными, усердно поет: священницы, благословите, людие, превозносите Христа во веки.

**Богородичен:** **В**о чреве носимому, всяческая носящему, блаженне Иоанне, поклонился еси, радуяся, во чреве крьемь неплоднем, прехвальне. Егоже, рождшася от Святыя Девы, Агнца Божия проповедаая, благочестно возопил еси: людие, превозносите во вся веки.

### Песнь 9



**Ирмос:** Устрашися всяк слух \* неизреченна Божия снизхождения, \* яко Вышний волею сниде даже и до плоти, \* от Девическаго чрева быв Человек. \* Темже Пречистую Богородицу, вернии, величаем.

**Неплодный** преподобен плод, в рожденных женами превышший, Царя Христа воин, великий Предтеча, проповедавый Агнца, мира прегрешения вземлющаго, да восхвалится священными песньми.

**Чашу** исполнив богато, созываеши с высоким проповеданием Церковь Христову обретением главы, Предтече: приидите, насытитесь пития красных, ихже уготовах, и возвеличите Сущаго, человеком подаемаго.

**Царь** тя, Ангеле Божий, ангелоименитый в свое царство, радуясь, приемлет, сослужащаго с сим добрейша пастыреначальника благочестно и званием, и благодатию украшаема яве Богоноснаго священника и Богомудреннаго.

**Облистал** еси Божественное просвещение главы твоя входом, славне, и уяснил еси верных сердца, вопиющих ти: Солнца незаходимый светильниче, всесвятый Предтече, страстей мглы нас, и весь град, и люди избави.

**Богородичен:** Пощади мя, Спасе, рождейся и сохрани рождшую Тя нетленну по рождестве, егда сядеши судити делом моим, беззакония презри и грехи моя, яко безгрешен и милостив Бог и Человеколюбец.

**Светилен.**

**Подобен:** Посетил ны:

**Не** терпяше на мнозе крыти земля главу твою, якоже глас вопиющаго; \* ты обретение ея образом неким возвестил еси, Предтече Иоанне, \* вонже ты почитаем.

**Слава:**

**Подобен:** Со ученики:

**Во** обретении, Предтече, честная твоя главы \* царь христоролюбивый множае радовашеся, якоже о своей царской порфире. \* Егоже возмездия победами свыше укрепляемь, и нас соблюди, \* покрый твоими молитвами, Крестителю прехвальне Иоанне, \* светло празднующих и любовию тя чтущих.

**И ныне, праздника или Богородичен:**

**На** Тя с Богом уповаем, Пречистая, \* из Тебе прошедшему, сраспинаемии Христу, \* Твоими к Нему мольбами невредны до конца ны сохрани.

**На хвалитех стихиры на 4, глас 5.**

**Подобен:** Радуйся:

**Радуйся**, священная главо, и светоносная, \* и Ангелом говейная, \* яже мечем усечена древле \* и острыми обличеньми нечистоты студ посекая, \* источник чудес, верная напаяющая, \* и яже Спасово спасительное пришествие возвестившая, \* и наитие Духа древле увидевшая, \* к Сему всельшаяся, \* ветхой же и новой ходатайствовавшая благодати: \* Христа умоли, душам нашим даровати велию милость.

**В** сосуде скудельне \* сокровенная иногда Предтечева глава явися, \* от земных недр издавшаяся явственне \* и чудес струи источающая: \* ибо в водах главу омы \* превыспренняя ныне покрывающаго водами \* и одождающаго человеком

Божественное оставление. \* Сию убо ублажим, воистинну преславну, \* и в сея обретеннии радостно празднуем, \* Христа моляще даровати душам нашим велию милость.

**Г**лава, яже Агнца Божия воспроповедавшая, \* плотию явльшагося, \* и всем покаяния спасительныя пути \* Божественными заповедьми известившая, \* яже прежде Иродово законопреступление обличившая, \* и сего ради отсечена от телесе, \* и на время подъемшая сокровение, \* якоже светоявленное нам возсия солнце, \* покайтесь, – вопиющая,– \* и ко Христу ныне приложитесь во умилении душевнем, \* подающему мирови велию милость.

**Слава, глас 6:**

**В**сечестную главу Крестителя Твоего, Господи, \* явльшуюся днесь от земли, \* со гласом хваления приемшии верно, \* в мольбу, Человеколюбче, \* грешнии раби Твои, приводяще, молимся, \* тоя ради уллучити в День суда от Тебе \* очищение и велию милость.

**И ныне, праздника или Богородичен.**

**Славословие великое. По Трисвятом тропарь Предтечи. Слава, и ныне, праздника или Богородичен: Еже от века: Ектении. И отпуст.**

## НА ЛИТУРГИИ

Блаженны, от канона Предтечи песни 3-я и 6-я.

**Б**лудным плясанием, священная глава твоя, скверней жене вдана бывши, рукама ношашеся, ныне же целомудренно священнодейственника дланьми священно во святую церковь вносится. [Дважды.]

**Б**лагочестно сретает тя верных совокупление, с священнодейственником же царь, славне Предтече, поюще радостию, и предваряет тя любовию, освящаемь пришествием твоим.

**О**т незаходимых священных, яко светозарное солнце, священнейшая глава твоя возсиявши, всю просвети вселенную, пророче Христов и Предтече, Божественными светлостьми.

**И**стина от земли, глава возсиявшая Крестителя Твоего, Христе, лжу отгна, ересей разори горькую зиму и мир просветила есть.

**П**очерпите просвещение, и благодать Божию, и милость и главы, и души освятите, главе прикоснувшися Предтечи благодати, Божественному верху прикоснувшася в водах.

**Слава; Главы** врагов под нозе сокрушити воинству нашему, молися, Предтече, любовию честную твою главу чтущему, Ирода обличившую.

**И ныне: Богородичен:** Сущим во аде Свет проповедал еси, приходящаго от кровей Девицеских, плотию обложена бывша Человека, на благодеяние человеков, блаженне Предтече.

### Тропарь Предтечи, глас 4:

**Я**ко Божественное сокровище, сокровенное в земли, \* Христос откры главу твою нам, пророче и Предтече. \* Все убо, сошедшеся в сея обретение, \* песньми богоглаголивыми Спаса воспоем, \* спасающа нас от тления молитвами твоими.

### Кондак Предтечи, глас 6.

**С**ветоявленный и Божественный в мире столп, \* солнца светильник, \* Предтеча, главу светоносную и Божественную свою показавый в концех, \* освящает той верно покланяющихся и взывающих: \* Христов премудрый Крестителю, спаси всех нас.

**Прокимен, глас 7: Возвеселится праведник о Господе \* и уповает на Него.**

**Стих: Услыши, Боже, глас мой, внегда молити ми ся к Тебе.**

### Апостол к Коринфяном, зачало 176.

**Б**ратие, Бог рекий из тмы свету возсияти, иже возсия в сердцах наших, к просвещению разума славы Божия о лица Иисус Христове. Имамы же сокровище сие в скудельных сосудах, да премножество силы будет Божия, а не от нас. Во всем скорбяще, но не стужающе си, нечаеми, но не отчаяваеми, гоними, но не оставляеми, низлагаеми, но не погибающе. Всегда мертвость Господа Иисуса в теле носяще, да и живот Иисусов в теле нашем явится. Присно бо мы живии в смерть предаемя Иисуса ради, да и живот Иисусов явится в мертвенней плоти нашей. Темже смерть убо в нас действует, а живот в вас. Имуще же тойже дух веры, по писанному: веровах, темже возглаголах, и мы веруем, темже и глаголем, ведяще, яко Воздвигий Господа Иисуса, и нас со Иисусом воздвигнет, и предпоставит с вами.

Вся бо вас ради, да благодать умножившаяся, множайшими благодарениями избыточествит в славу Божию.

**Аллилуия, глас 5: Свет возсия праведнику:**

**Стих: Истина от земли возсия, \* и правда с Небесе приниче.**

### **Евангелие от Матфея, зачало 40.**

**В**о время оно, слышав Иоанн во узилищи дела Христова, посла два от ученик своих, рече Ему: Ты ли еси Грядый, или иного чаем? И отвещав Иисус рече има: шедша возвестита Иоаннови, яже слышита и видита. Слепийи прозирают и хромии ходят, прокаженнии очищаются и глушии слышат, мертвии встают и нищии благовествуют. И блажен есть, иже аще не соблазнится о Мне. Тема же исходящема, начат Иисус народом глаголати о Иоанне: чесо изыдoste в пустыню видети? Трость ли ветром колеблему? Но чесо изыдoste видети? Человека ли в мягки ризы облеченна? Се, иже мягкая носящии, в домех царских суть. Но чесо изыдoste видети? Пророка ли? Ей, глаголю вам, и лишше пророка. Сей бо есть, о немже есть писано: се, Аз посылаю Ангела Моего пред лицом Твоим, иже уготовит путь Твой пред Тобою. Аминь глаголю вам, не воста в рожденных женами болий Иоанна Крестителя, мний же во Царствии Небеснем болий его есть. От дний же Иоанна Крестителя доселе Царствие Небесное нудится, и нуждницы восхицают е. Вси бо пророцы и закон до Иоанна прорекоша. И аще хотите прияти, той есть Илия хотяй приити. Имеяй уши слышати да слышит.

**Причастен: В память вечную будет праведник:**

### **Молитва**

**К**рестителю Христов, проповедниче покаяния, кающагося не презри мене, но, совокупляясь с вои Небесными, молися ко Владыце за мене, недостойнаго, унылаго, немощнаго и печальнаго, во многия беды впадшаго, утружденнаго бурными помыслы ума моего. Аз бо есмь вертеп злых дел, отнюдь не имеяй конца греховному обычаю, пригвожден бо есть ум мой земным вещем. Что сотворю, не вем, и к кому прибегну, да спасена будет душа моя, токмо к тебе, святой Иоанне, благодати тезоимените, яко ты пред Господем, по Богородице, вем больша быти рожденных всех: ты бо сподобился еси коснуться верху Царя Христа, вземлющаго грехи мира, Агнца Божия. Егоже моли за грешную мою душу, да поне отныне, в первыйнадесять час, понесу тяготу благую и прииму мзду с последними. Ей, Крестителю Христов, честный Предтече, крайний пророче, первый во благодати мучениче, постников и пустынников наставниче, чистоты учителю и ближний друже Христов, тя молю, к тебе прибегаю, не отрини мене от твоего заступления, но возстави мя, падшагося многими грехи, обнови душу мою покаянием, яко вторым крещением, понеже обоего начальник еси, крещением омываяй **грех**, покаяние же проповедуяй во очищение коегождо дел скверных; очисти убо мя, грехми оскверненнаго, и понуди внити, аможе ничто же скверно входит, в Царствие Небесное. Аминь.

\* \* \*

**Аще случится обретение главы Иоанна Предтечи в неделю 7-ю по Пасце, святых отец:**

Оставляется служба праздника Вознесения, и поется служба воскресна, и Предтечи, и святых отцев. В субботу на малой вечерни поем, якоже указася во главе Богослова. На велицей вечерни по обычной кафизме, на Господи, воззвах: стихиры воскресны 3, и Предтечи 3, и святых отцев 4. Слава, отцев. И ныне, Богородичен воскресный гласа. По входе чтения отцев и Предтечи. На литии стихира храма и Предтечи хвалитны. Слава, отцев. И ныне, Богородичен. На стиховне воскресны. Слава, отцев. И ныне, Богородичен. На благословении хлебов, тропарь, Богородице Дево: дважды, и отцев, единожды, и чтение в Деяниях апостольских. На утрени на Бог Господь: тропарь воскресный и отцев. Слава, Предтечи. И ныне, Богородичен. По кафизмах седальны воскресны и чтение во Евангелии. Таже полиелей и седальны Предтечи, оба по единожды, без Богородичнов. Слава, седален, иже по полиелеи. И ныне, Богородичен и чтение Предтечи. Прочее же поем на утрени, и на часех, и на Литургии, якоже указася во главе Богослове.

\* \* \*

Подобает ведати: Аще случится память обретения честныя главы в субботу Пентикостную или в неделю Пятдесятную, поем службу его в четверток 7-я недели.

\* \* \*

Аще ли же случится обретение честныя главы Иоанна Предтечи в понедельник Пятдесятный, поем на утрени во вторник, с праздничною службою вкупе.

\* \* \*

Аще ли случится обретение главы Предтечевы в пяток седмыя недели по Пасце, во отдание Вознесения Христова, или в субботу пред неделюю всех святых, во отдание праздника Пятдесятницы. И поем службу его наряду в субботу, вкупе со отданием праздника. В пяток вечера поем Блажен муж: 1-ю Славу. На Господи, воззвах: стихиры праздника, на 6, и святого, на 4. Слава, святого. И ныне, праздника. Вход, прокимен дне и чтения святого 3. На литии стихиры праздника и святого стиховны. Слава, святого. И ныне, праздника. На стиховне стихиры праздника, с припевы их. Слава, святого. И ныне, праздника. По Трисвятом тропарь святого. Слава, и ныне, праздника. И отпуст.

На утрени, на Бог Господь: тропарь праздника, дважды. Слава, святого. И ныне, праздника. По кафизмах седальны и чтение праздника, полиелей и седальны святого вси. Слава, седален, по полиелеи святого. И ныне, праздника, и чтение святого. Степенна, 1-й антифон 4-го гласа. Прокимен и Евангелие святого. Псалом 50 и стихира святого. Канон праздника со ирмосом на 6, и святого на 4, и друтий праздника на 4. Катавасия праздника. По 3-й песни кондак святого, и икос, и седален святого, дважды. Слава, и ныне, праздника и чтение святого. По 6-й песни кондак праздника и икос. На 9-й песни Честнейшую: не поем, светилен праздника. Слава, святого. И ныне, праздника. На хвалитех стихиры праздника 3 и святого 3. Слава, святого. И ныне, праздника. Славословие великое. По Трисвятом тропарь святого. Слава, и ныне, праздника. Ектении, и отпуст. И час 1-й. На часех тропарь праздника. Слава, святого. И ныне, Богородичен часов. По Отче наш: кондаки премеяем праздника и святого. На Литургии: Блаженны праздника, песнь 9-я на 4, и святого песнь 3-я, на 4. По входе тропарь праздника и святого. Слава, кондак святого. И ныне, праздника. Прокимен, аллилуия, и причастен праздника, и святого. Апостол и Евангелие дне и святого.

\* \* \*

О томже празднице подобает ведати: Аще случится обретение честныя главы Предтечевы в неделю всех святых, поем службу его в пяток. Аще ли коего великаго святаго, еуже во уставе укажется бдение, поем службу великаго святаго в настоящую сию неделю всех святых, якоже Иоанна Богослова, в 7-ю неделю по Пасце, со святыми отцы в ряду, такоже и zde поется.